

大寧縣志卷之六

人物集

鄉賢

宦業

孝義

貞烈

隱逸

仙釋

貤封

自選舉之法行而人物出焉或黼黻君國或霖雨
蒼生澤繫一時而風流千古為鄉賢為宦業士大
夫之有德行者或羅家難曲意承二人歡變而不
失其常或援人於危難急遽中扶持安全以玉於
成為孝為義女子而有丈夫之風者從一而終上

奉翁姑下撫諸孤及臨患難之死靡他一瞋目而後世莫不視為節為烈邈世之流潛修一室凡一切顯赫事悉泥土視之烟霞性命泉石膏肓則又為隱逸皆人物也若仙與釋雖云荒唐不經然或從遊於黃石赤松或印心於清池皓月亦人物類也封貤則又朝廷之恩施或褒其義方之訓或獎其貽謀之善以錫其父若祖以爵於人物亦類也之數者道器殊形才諳異施丈夫女子不一質偏全奇正幽明顯晦不同途然皆各操其性之所至

以自足千古者也過而問焉能令見者興思而聞者足以佩服而不忘是可以風也

鄉賢

明

曹需

永樂里人洪武間由歲貢除授山東道監察御史秉
公持憲臺閣風生解組家居不預外事鄉黨稱為真
御史

王欽

洪武間由貢士除授戶部員外郎居官清正且素履
端方有古人風

暢茂

宣德間舉人歷官保定府教授克端師範居鄉謙慎

啟誘後進甚多

王銳

由貢士歷任荊門州判

馬尹昌

由貢士除授香河縣丞清廉仁慈香河人德之勒過
愛碑祀名宦先是尹昌病劇弟尹康祝天願以身代
尋康果寢疾歿昌疾乃愈昌感弟義田產悉畀康子
世守等以謝之

安民

字熙寰由貢士任陝西褒城知縣事母孝謹供極甘
旨母老凡便溺器皆民手澡居鄉醇謹人稱為古君
子崇正壬申殉難

張斗辰

字徽垣永樂里人貢士為人慨慷有氣節崇正壬申
闖賊陷城斗辰率衆拒之不勝而罹於難

國朝

張自興

字元啟永樂里人由行伍歷官至大同總兵生而仁

厚篤於孝友雖從戎疆場時以高堂繫念後得祿養
迎於官署朝夕承歡又念伯兄遠隔亦迎於官聚首
一堂愛敬備至且視姪如子視姪孫如已孫撫育姻
締玉之於成又聞族人逋賦三百餘兩代為輸納得
免追呼自中表以及姻婭故交貧窶難堪者輒慷慨
資助終無德色其居官清慎勤勞王事久已嘖嘖人
口卒之日蒙

聖祖

仁皇帝賜祭葬加贈褒卹邑人仰其德公舉祀鄉賢

官業

明

馬中秀

字景宇萬厯間歲貢授山東臨清州判任三年竭力
漕務革河役之奸禁水飛之累部院四薦其能晉四
川營山令營俗侈於嫁生女多溺之多裁使適中女
免於殤會有募假印者發其奸人皆悚服奉上檄協
采三殿木多獲異材山行幾二年上司為之嘉賞至
修文昌閣以崇文教立養生社以救疾疫申明鄉約

以化愾淫具載營山縣志中天啟二年陞雲南祿勸
州牧會奢酋之變直指疏改蓬州多力辭歸崇禎三
年進階奉政大夫如貤封例家居杜門不出日整冠
飲客端坐庭中博覽羣書晚年舉大賓壽七十四歲
卒邑人推為德望兼隆宜從祀鄉賢蒙巡方批允彙
題會闕逆變起事尋寢

張斗星

字奎垣由天啟丁卯科舉人除授江南潛山縣令時
潛地經闖寇殘破斗星撫字周恤方獲安堵催科俱

以勸輸盜賊多以義諭數月而潛大治時有四諸生
以仇誣禡其中斗星屢詳督學為之辨復又有寇遺
難婦若干人俱查遣還家人人感悅會踏災傷值一
危磴人多不敢渡名曰試心橋斗星平步徑過少無
怖容乃為口占一絕有自檢心中無別物試心橋上
獨徘徊之句斗星家世清貧為諸生時讀書西寺瓦
窰中并日而食十年不出後舉孝廉官潛山僅一載
自度不合時宜卽掛冠歸杜門謝客不伍流俗潛心
書史八十不衰邑令重其齒德舉鄉飲大賓居家崇

尚禮教特行冬至祀先慶賀禮生三子銘鑑鈐教以
義方必冠而後婚俱恂恂有儒風

國朝

張自興

字元啟賦性忠勇効力行間聞吳逆猖狂奮力前驅
進寶雞取武關拔兩河復天水渡錦江直抵曲靖不
踰年而滇黔蕩平以軍功補授標弁歷陞宜君營叅
府會於菟噬人公搏逐之行人無虞險阻屢蒙

聖祖仁皇帝恩綸下頒擢鎮雲中潔已率屬紀律嚴明兵

民帖服適值澤旺肆逆協標弁兵遠征塞外差員犒賞且捐備鑼鍋帳房遣送軍前又奉

諭旨

晉省撫鎮標兵分派各赴西寧聽調公賞給皮襖煖帽復購駝隻載軍器口糧凡旗幟器械悉捐俸製備一時軍威丕振

孝義

明

張機

義亭里安阜鎮人貢士按阜城塞河東準子平有荒
塚題於石曰明孝子貢生張機之墓旁註小字云萬
歷十七年知縣事程查得貢生張機廬墓以思親三
年不改殺身以全母一死猶生芳名推重於泮官孝
行允孚於月旦申舉到府轉申欽差提督學校山西
等處提刑按察司僉事范批立石

曹定國

字世用義亭里人邑學廩生事父純孝朝夕不去側
會督學檄考歲薦以父賢年高具呈辭不就督學嘉
之許免試仍給之廩餼以遂終養

曹鴻達

字肖亭義亭里安阜鎮人父汝相患癰十餘年凡飲
食起居達時刻左右之或時加怒責破其面達笑容
以受並無難色父病革達頻為嘗糞甘苦以卜存亡
及居父喪隆冬號泣七日不湯三年倚廬時有東街

曹孝子之稱

馬尹康

割麥里麻束村人賦性直方義氣不羣事兄尹昌曲盡友恭尹昌有疾幾不起康日夜焚香告天請以身代數日昌病漸愈康果卧病而卒

曹自得

字樂吾義亭里安阜鎮人由歲貢歷任通州衛經歷性廉介取與不苟未仕時家貧乏米出門求貸走通衢拾遺囊二十金尋訪係里老糧銀呼而還之